

湖南苗防屯政考

7卷 4  
1392  
11



門 4  
第 1832  
卷 //



湖南苗防屯政考卷九

二品銜前署湖南辰永沅靖道但湘良纂

均屯五

會奏清查苗疆屯防事宜條款摺

道光十八年

湖廣總督林則徐  
湖南巡撫錢寶琛

奏為清查苗疆屯防事宜酌議條款恭摺奏祈

聖鑒事竊照道光十六年前撫臣裕泰奏請將辰沅道經管屯防事宜  
澈底清查凡民苗生計兵勇口食並應興應革有關利弊者斟酌  
損益另議章程以清積弊等因欽奉

硃批經國遠猷必當隨時整飭汝能見及深屬可嘉妥議奏來欽此當

經札飭該署道王簡遵照查辦去後前撫<sub>臣</sub>裕泰旋即奉

旨調任江西未及議奏

<sub>臣</sub>

林則徐上年巡閱營伍親蒞鎮筵體察情形

苗民尙屬相安丁勇自滋事懲辦之後亦知安分守法當囑該署道妥爲撫馭一面將經管屯防事宜逐一澈底清查酌議詳辦嗣據查明列款具詳批司會議<sub>臣</sub>錢寶琛蒞任時適值該署道王簡因撫<sub>臣</sub>調赴省垣質算交代尙未出省復又諄飭該署道會同藩臬兩司將實在應興應革有關利弊之處悉心妥議以憑核辦茲據司道等會議具詳前來<sub>臣</sub>等復加查核往返札商謹將分別清釐及籌議歸補各事宜開列條款恭呈

御覽

一清屯田查鳳凰乾州永綏古丈坪保靖瀘溪麻陽七廳縣於均屯經久章程未盡事宜各案內奏明丈收田土十五萬二千一百五十七畝一分內除重丈退還撥還營兵馬廠並水衝沙壓分授老幼丁等田土六千一百九畝零又分授屯長屯丁田四萬四千三百四十六畝外實在田土十萬一千七百一畝零均係招佃收租以供練勇鹽糧暨一切經費之用前項田土給佃承種發領執照按額催徵向由各該廳縣及屯備弁等層遞稽查至屯長屯丁分授田畝從前鳳凰永綏二廳閒有私行典押之事迨道光元年及十三年節次清查以後俱係屯長屯丁自領耕種實無典當情弊現由屯百總總旗小旗取具切實甘結並據各廳縣加結賚道

由道復查並無捏飾第恐日久生懈應仍飭該道督飭各廳縣加意查察如有違禁私典並移坵換段以己分授之田假爲民田出當者卽行從嚴懲辦務使積弊永除而屯防期於經久

一清佃欠查苗疆均屯田土經前任辰沅道傅爾先後詳請奏定章程並續詳各款共收租穀十萬五千四百八十八石零嘉慶十九年清查案內奏明核減穀五千五百石每歲實徵租穀九萬九千九百八十八石零道光元年籌議苗疆事宜案內又奏減租穀二萬七百七十餘石實徵租穀七萬九千二百一十八石零永爲定額道光元年及八年十年因節被水旱共短收穀四千五百六十五石零業經前督撫臣奏奉

恩旨豁免並准部咨不敷經費飭令籌補等因各前道均因無款可籌

虛懸待補又道光十一二三四等年短收穀五千一石零疊經該道勒限嚴追無如苗疆田土瘠薄水耕火耨終歲勤動所獲無多佃戶完納額租較民間輸賦爲重豐歲收穫僅供口食本鮮蓋藏一遇歉收輒形匱乏且原佃多係逃亡故絕現在半皆另招頂耕新更之佃力難代完舊欠各戶本年秋收僅敷完納額租如復帶徵節年租穀實屬力有未逮合無仰懇

皇上天恩俯念苗疆瘠苦佃力維艱懇照十年以前歷豁佃欠各案准

其一體豁免嗣後請責成該道督飭屯弁董率各佃廣開水利務勤力作以收地利而清額租不得再任蒂欠

一清支銷查屯防經費前在嘉慶年間本有租穀十萬餘石以供各項支用迨道光元年清查案內租穀既減去二萬餘石一切經費亦卽加意刪節經前道趙文在會同永順知府諸嘉杏等按款確查每年實需支用銀穀七萬九千二百餘石內每年支用銀二萬五千二百九十餘兩係供支七廳縣屯備弁俸廉練勇餉乾馬價操演鉛藥紅白惠賞歲修礮卡完納均田糧賦之用又每年應支穀三萬八千六百四十石零係供支屯弁練勇苗戰守兵口糧添製軍械修理水衝沙壓田土工本書院生童膏火屯苗義學館穀倉書斗級人等工食等項之用又每年應支穀四千二百二十九石零係爲加增書院生童膏火屯苗義學館穀各廳鄉勇義烈

祠祭祀儒學薪水以及育嬰堂養濟院各處口糧等項之用又每年應支銀五百五十餘兩係爲支發辦理七廳縣報銷經書工食紙張盤費碾米工匠價銀軍裝火藥二局柴火燈油加給弓箭教習工食及檢蓋練勇兵房等項之用又每年應支穀一萬五百石零係支發匯辦七廳縣均屯冊檔書役薪工屯長薪水工匠口糧運送鹽糧穀石夫價水腳押運盤費檢蓋倉廩修製車斛屯防差役口糧及承緩殘廢丁三百名口糧又未授田老幼丁口糧等項之用以上每年應支銀穀歷係由道經營並各廳縣坐支彙總造報均係必不可少之需難以再減應請照舊支銷

一清借款上年前督臣訥爾經額等會奏鎮算善後章程案內聲

清江府志卷之九  
明練勇借支銀穀一項愈積愈多究屬濫支欽奉

諭旨著於清查案內將如何酌定限制之處另籌辦理等因欽此欽遵  
在案 臣等伏查苗疆民貧地瘠田土歸公其額設練勇一千名除  
支食糧餉外別無田產及生計可圖殊形苦累前道傅鼐於每年  
年底及青黃不接之時由道備給銀穀調濟仍按月在於該練勇  
等餉銀內扣還歷任道員俱有借扣之事道光七年收成歉薄例  
支餉銀不敷食用所借之穀較前加增十二年又值洋泉廣東等  
處出師借支行裝銀兩一併歸於月餉內扣還歸款積欠既久扣  
限愈多每名月餉除扣之外實不足以資餬口委難責令枵腹操  
防除十六年挾借一案先經奏明分別扣賠外查有從前歷年借

欠銀六千四百餘兩為時既久原借各練勇多係病故退伍實屬  
無力完繳無從著追現據該練勇等籲求豁免並出具永不復借  
甘結由道轉詳又屯丁歷年借穀並苗備弁代各苗兵借穀向係  
年清年款尚無拖欠惟其中革伍病故歷年積壓無可著追者合  
計尚欠穀一千一百七十餘石現據該道查明實係流亡故絕無  
從追繳應同前項練勇歷年借欠銀兩奏懇

天恩

一體免追以示體恤經此次清查豁免之後該道儲備銀穀不准  
再有濫借庶清其源以截其流日後如遇水旱不時或征調差遣  
不得已而復有請借之事應令該道隨時詳明督撫酌核辦理不  
准由道自行借給以示限制

一籌歸補查以上各款內有道光元年八年十年已奏奉豁免穀四千五百六十餘石原議籌款歸補因苗疆經費有常既經豁免租額度支有絀無盈至今尚未歸補又道光十一二三四等年佃欠短收穀五千餘石又屯丁苗官借欠穀一千一百七十餘石又練勇歷年借欠銀六千四百餘兩現經<sub>臣</sub>等奏請一併豁免如蒙俞允以穀一石折銀一兩總計短缺穀銀一萬七千一百四十餘兩俱關苗疆月支糧餉及一切經費要需亟宜籌款歸補溯查嘉慶十年議定均屯章程之後至十九年清查案內共計歷年借墊穀銀五萬二千六百餘兩經前撫<sub>臣</sub>廣厚奏請分別捐賠歸補又道光元年查辦苗疆儲積案內計歷年動缺穀六萬九百餘石經前任

督撫<sub>臣</sub>陳若霖左輔奏請借動司庫捐監銀六萬九百兩發交辰沅道採買穀石以資儲備各在案茲自前次道光元年清查截至十六年年底止比上兩屆歷年更久而所短銀穀尙不致如上兩屆之多據該道稟稱支款匱乏自應速爲籌補但

國家經費有常未敢懇

恩賞給款項<sub>臣</sub>等公同設法籌議查有漢岸鹽商生息一款本爲苗疆經費而設原奏聲明本銀十萬兩每年應歸銀五千兩作二十年歸完現已歸過十六次本銀八萬兩尙未歸銀二萬兩計四年即可歸足今因苗疆需用應請將漢商歸本之息量展四年以資籌補惟商息按年提取而籌補則難以緩延先請於司庫通米經費

項下借支銀一萬七千一百四十餘兩發交該道分別歸補儲備俟漢商生息解到陸續歸還通米經費借款如此一轉移間苗疆儲備胥歸有著而庫項仍不至虛懸似爲兩得

一清催徵查鳳凰乾州等七廳縣額設屯長二百名經理屯田穀石專司出納前有屯長田多稼等短交租穀四千餘石經歷任道員追交過半內有本身病故暨家產盡絕無著者亦經前道代爲賠補現無侵蝕情弊惟各廳縣屯田十萬餘畝均處萬山之中每當山水漲發易於衝刷自道光六年之後沙水衝壓之田較前爲多俱經該道隨時勘估修理第查近溪田畝內有節年被水衝廢已成溪壑不能修復者計三百三十三畝零現在基址無存每年

缺額無收穀二百八十餘石均係歷任道員捐賠由來已久臣等伏查此項衝廢田畝既據該道查明基址無存實屬無從修復所有缺收租穀自未便徒存虛數致令永遠捐賠現當澈底清查相應據實奏明請將前項廢田租穀照例豁除所有每年不敷額租應令該道在於生息餘存項下撥補支放以杜虧累

一申邊禁查鳳凰乾州永綏古丈坪保靖五廳縣額設苗官四百八十六名給以守備千把外委職銜層遞管束散苗雖歷年遵行相安無事第恐日久弊生難免無盤剝之弊其各書吏專司彙案經理支發亦難保無勒索情事現奉

諭旨清查自應嚴行申禁經該道飭據各廳縣申復所管各苗備弁內



前有守備梁開科干總吳老吼歐通幟把總龍老巴外委龍隆景石添榮廖老寅等因約束不力不洽輿情俱經斥革另補其書吏內前有延玩誤公之文碧祥等十四名亦經隨時斥革現俱奉公守法並無盤剝勒索情弊出具印結申道並查現無漢奸私入苗地及與苗人聯姻串通勾結之事苗疆一律安堵應令該道督飭各廳縣隨時查察如有前項情弊立即從嚴懲辦仍責成該廳縣於每年年終分案出具印結送道備查倘敢徇縱由道據實揭參究辦總期民苗畏服永靖邊圉

一移屯員查嘉慶十年均屯經久章程案內奏准鳳凰廳原挑備戰練勇一千名以五百名駐劄上五崗之新場堡以五百名駐劄

下五崗之同全坡分爲左右二哨每哨設屯干總屯把總屯外委屯額外各一員管帶訓練嘉慶十四年添設北關屯守備統轄練勇並督率千把總外委額外等官按日訓練此舊制也伏查各省營制額兵千名必須副參大員統領分設都司守備層層管帶互相鈐束今以守備一員統轄練勇千名既與體制未符且事務殷繁於訓練難期得力以致因循怠玩有上年挾借之事雖經懲辦之後該勇等咸知震懾自不敢復蹈前轍第苗疆重地固宜稍專責任亦不可偏重事權上年給事中常大澗陳奏鎮守善後章程案內有將道標練勇分勻安置三廳之議經前督臣訥爾經額前撫臣裕泰鎮守總兵楊芳遵

旨會議以練勇與營兵聚處一城角勝爭能素稱精悍控制未善難保不恃強滋事若分撥三廳安置使之勢散易制實屬法良意美惟查該練勇多係土著類皆貧苦別無生計必須攜家同往就養現在月領餉銀扣數尚多得項僅敷口食盤費實難設措應請暫循其舊俟一二年後扣款漸少丁力稍紓再行察看籌辦等因奏奉  
俞允在案今察看情形該練勇等攜家遷徙力有所難莫若循照舊章略爲通變臣等公同酌議查有原設新場堡屯守備一員僅管催租事務較簡應請將該守備移駐鳳凰廳城與北關屯守備仍照原管左右二哨分設兩營各管練勇五百名足資控馭所管千總把總外委額外等官俱循其舊所有新場堡屯守備原管催租等

事應改歸永安卡屯千總責成就近兼管可無貽誤庶因地制宜於邊防益昭慎密

以上各條奉

硃批該部議奏欽此旋經戶部會議奏稱臣等伏查湖南省苗疆屯田自嘉慶十年先後奏定章程經原任辰沅道傅爾經畫十餘年漸臻詳備以苗疆之所入供苗疆之所出行之三十餘年民苗相安無事惟奉行日久情形或有不同自不能無小有變通之處今據該督撫會奏酌議章程列爲八款臣等逐款詳查與原定章程悉心核對係於小有變通之中仍寓慎守舊章之意與輕議更張者不同其查禁屯長屯丁典押地畝一款嚴禁苗備弁書吏盤剝勒

海防軍餉正考 卷九  
索一款俱係申明舊例其屯防經費一款亦稱照舊支銷臣部查對原定章程均屬相符既據該督撫聲明田畝並無典押備弁書吏並無盤剝勒索亦無漢奸私入苗寨及與苗人聯姻勾結串通等弊其歲需經費銀兩稱係必不可少之需難以再減應令該督撫轉飭該道循照舊章妥爲辦理其免追借欠一款既據取具永不再借甘結並聲明遇有水旱或有調遣亦令詳明督撫酌辦不得由道擅借係爲慎重借項起見所有從前歷年積欠銀六千四百餘兩穀一千一百餘石既據聲明多係病退故絕無從著追應免其追繳以清軫轍其豁免佃欠一款據稱屯田租穀節被水旱除已豁免外尙短收穀五千餘石聲明原欠之佃戶多係逃亡故

絕現在另招新佃力難代完舊欠懇請豁免又豁除租額一款據稱屯田十萬餘畝均處萬山之中山水易於衝刷查有積年衝廢不能修復者二百三十餘畝每年缺穀二百八十餘石實係水衝沙壓基址無存聲請照例豁除臣等再四思維苗疆屯田與腹地情形不同既據聲明佃欠無可著追廢田無從修復應准其豁免積欠穀五千一石零豁除缺額穀二百八十餘石以紓佃力而免追呼經此次清查之後應令督撫轉飭該管官實力奉行年清年款不得藉口成案動議豁除以昭限制又籌補穀石一款據稱節次豁免銀穀總計共缺銀一萬七千餘兩係關苗疆經費亟須籌補暫借通米經費款內銀一萬七千餘兩抵補儲備仍於漢商生

息款內展收四年息銀歸還原借本款查與另請別項增添開銷者有間亦應如所奏辦理至移駐屯守備一款兵部議該督等係為因地制宜起見應如所奏原設鳳凰廳新場堡屯守備准其移駐鳳凰廳城與北關屯守備分管左右二哨各帶練勇五百名其新場堡原管催租等事改歸永安卡屯千總就近兼管之處亦應如所奏辦理三月十九日奉

旨依議欽此

奏巡閱湖南營伍親歷苗地查看情形摺

道光二十七年

湖廣裕 泰

奏為巡閱湖南營伍順道親歷苗地查看情形恭摺奏祈

聖鑒事竊

臣

由常德取道辰州較閱營伍後即赴苗疆自鳳凰永綏等

廳至保靖縣周環苗境皆係崇山峻嶺苗民依山傍崖而居有百餘戶為一所有數十戶及數戶為一所者或砌以石堡或散處山巔統謂之苗寨沿途經歷之處舊設礮樓哨臺礮臺及汛堡屯卡均屬櫛比整齊各廳縣苗弁自守備以及外委俱率領苗兵俯伏道傍甚形懍畏又苗舉人生員並義學館師亦帶同學徒在途迎謁臣隨諭以各安耕讀循分守法均即分別獎賞銀牌及紙筆荷

包等物均各歡忻叩頭而去本年苗寨收成尙稱中稔現在暘雨  
應時可以播種春麥該管辰沅道呂恩湛久於南省撫綏整頓在  
在均極得宜屬弁民苗靡不悅服氣象甚屬恬熙惟是苗性狡悍  
靡常不可因其輸誠懷畏稍存大意臣已面諭該道呂恩湛及各  
鎮將廳員等以苗情既極馴順尤當倍加撫卹實心經理嚴查漢  
奸毋許進寨詐擾營汛礮卡不時修葺練勇屯兵勤加訓練毋稍  
懈怠以期長治久安仰副

**聖主**綏靖邊圉之至意所有臣查看鳳凰永綏保靖等廳縣苗疆情形  
理合恭摺具奏再湖南苗疆自嘉慶初年戡定以後奏准於鳳凰  
永綏瀘溪麻陽保靖古丈坪等廳縣設立均田屯勇以資捍衛以

均出田土給丁領種召佃收租以供屯防經費且耕且守原爲綏  
靖苗疆起見洵屬籌邊良法惟是行之既久流弊滋多其中苗官  
之盤剝屯長之侵欺以及私行典當均所不免是以臣於道光十  
六年在湖南巡撫任內奏明清查核定租額刪除煩費斟酌損益  
妥議章程行之又逾十年民苗甚屬相安惟上年聞乾州廳苗佃  
有聚眾議款抗租情事當經臣飛札飭查旋據該道呂恩湛稟覆  
已委員前往查明各苗佃俱已畏法解散具限繳租各安生業靜  
謐如常此次臣巡閱苗疆復畱心查訪實緣有無賴痞苗從中播  
弄愚苗無知受其煽惑旋經該道委員彈壓亦卽畏拏解散事雖  
出於一時亦不可不防其漸臣當卽擬發告示曉以利害並宣示

皇恩之高厚

國家之威嚴諭令散款納租呈繳器械准予自新倘仍抗違即當  
奏明從嚴懲辦該屯苗兵弁環跪叩頭甚形感懼似出真誠因思苗  
疆山多田少地瘠民貧苗人佃種公田十年之閒水旱固亦時有  
倘其中水衝沙壓不能修復田土若仍令其照常交租殊不足以  
示體卹而昭公允自應再予一律清查臣已諄飭該道督同苗疆  
各廳縣周歷查勘秉公清理所有水衝沙壓田土有堪以修復者  
給費修復不能修復者懇  
恩豁免其失額田租另行籌補如此分別辦理庶苗佃無所藉口得以  
久遠相安於苗疆屯防不無裨益十一月初九日欽奉

硃批善者撫之惡者懲之不肖之文武黜之一切悉秉公正自可永無  
事矣切記毋忽欽此

謹按此摺裕莊毅公巡閱苗疆回駐澧州順林驛行轅拜發方  
郵遞遵途之日正乾州款苗石觀保等跳梁起事之辰一時煽  
脅鄰郊屯務甚形岌岌幸賴迅張撻伐功奏七旬首禍駢誅完  
租復舊大府推原亂本患由凋敝相仍迺籌陳善後十條並通  
減額租一成蠲逋滌弊俾窮邊瘠佃咸  
感二天矣款費詳廳志兵防勦撫志中



璵會同臣裕泰奏蒙

恩旨賞給籽種穀六千石又經臣裕泰籌發銀二千兩復經臣陸費璵查照年例奏借苗疆五廳縣各丁佃籽種穀一萬五千石均交該道督飭印委各員按戶核實散放現在苗眾耕種有資安常樂業極爲靜謐又各廳縣水衝沙壓田土前經臣等奏准清查分別豁除租額給資修復並將其餘屯租酌議輕減以示撫卹惟查自均田以來四十餘年各丁佃原授田土難保無輾轉接佃現種之戶大半並非原業必須接畝履勘查明現在承種戶名分別減豁方可實惠均霑茲已飭據各丁佃各將田土開明頃畝四至具報廳縣聽候委員會同查勘因現值農忙之時青苗遍野恐傷禾稼難

以丈量應請展至秋收後再行逐段勘明確核應豁應減租穀實數另行妥議具奏以昭核實外其餘應沿應革事宜經臣等訪察現在情形參以從前例案其中有應酌改章程者有應明定限制者有應嚴申禁令者有應酌加體卹者謹逐一會核妥議伏候

聖裁七月三十日奉

硃批該部議奏欽此旋據戶部奏稱臣等伏查湖南乾州廳痞苗石觀保等滋擾業據該督撫將首夥各匪犯拏獲照例擬結奏明在案所有一切善後事宜均關緊要必須隨時整頓斟酌妥善可期經久現據該督等督同司道體察苗情酌議條款奏報到部臣等按款核議恭呈



一據奏稱裁汰經費以歸節省也查苗疆原設屯苗義學一百館教課苗童嗣於嘉慶十五年添設二十館以期廣爲訓迪數十年來各苗生童父教其子兄課其弟多能自行勤學原設義學一百館足資課讀所有續添義學二十館應請裁汰等語禮部查湖南苗疆原設屯苗義學一百館嗣又添二十館原期廣爲訓迪迄今數十年來各苗生能自勤學所有續添義學應如該督所奏裁汰仍責成該督飭令各苗生認真課讀勿致曠功庶於經費有裨而教育亦日廣矣又屯防籌款項下有均屯總局委員書役薪水工食穀九百二十七石六斗據稱屯防委員久經裁汰惟總局有均

田授畝各冊檔仍須書役經管應酌留工食穀一百四十石其餘穀七百八十七石六斗亦可核刪畱充屯防不敷經費之用戶部查前項裁汰均屯總局書役工食穀七百八十七石六斗並裁汰義學節省穀四百七十二石均係因時制宜應行裁減之項應如所奏辦理

一據奏稱佃戶完納租籽合勺尾數應明定限制也查屯長斗級人等遇有合勺尾數輒將兩手捧量爲一合一手捧量爲一勺實屬積弊應請嗣後佃戶完納租穀尾數在六合以上者進取一升以下者退出不計責成承催之屯備認真稽查等語臣等伏查歲收屯租顆粒皆出苗民脂膏自應折中定制以杜浮收如該督等

湖南陽明正考 卷九  
所奏凡遇佃戶完納租穀尾數在六合以上者進取一升如在五合九勺以下者退出不計戶部核其所擬甚屬平允應令嗣後作為定制以杜浮收仍令隨時稽查該管官弁及屯長人等如有仍蹈前轍者立即從嚴究辦

一據奏稱屯田徵租執照紅簿應改用各廳縣印信以昭慎重也查苗疆屯防徵收租穀向來各佃交租即由承催之屯備弁給予收條既不蓋用印信難免重徵多索之弊所有徵租執照紅簿嗣後應改由廳縣蓋用印信一如徵收錢糧之法悉用三連板串如遇佃戶交納租穀即行截串給領以備稽核至屯備弁承催督催每視功過章程為具文不免心存玩泄應責成各廳縣隨時稽查

如有催租不力年終核計分別降革倘該廳縣並不認真督率亦由該道詳請核參等語臣等伏查苗疆徵收租穀係為經費要需自應酌定章程以杜混冒如該督等所擬嗣後徵租執照紅簿應改用各廳縣印信一如徵收錢糧之法悉用三連板串如遇佃戶交納租穀即行截串給領係為慎重租賦起見應如所奏辦理仍令該督等轉飭各廳縣隨時稽查該承催備弁等實力催徵年終分別功過如有催租不力分別降革倘該廳縣並不認真督率一經查出即行照例參辦

一據奏稱苗人款頭名目應永遠禁革也查近年乾州苗人輒於各寨議立款首私設款單把持公事武斷鄉曲報復私嫌不可不

嚴行申禁嗣後苗民如有戶佃田土口角鬪毆等事卽赴該管廳縣呈控不准苗人私自議罰如有苗人議款情事並卽嚴拏究辦倘該苗官徇隱不首事發一併究辦仍飭辰沅道於每年冬令將禁革款頭名目及佐雜苗官不准擅受苗詞出示曉諭俾苗民咸知凜戒等語臣等伏查苗民設立款頭把持公事武斷鄉曲報復私嫌實爲滋事之由自應嚴行查禁以靖苗疆應令該督等轉飭該管廳縣隨時查察該苗民等如有前項情弊卽嚴拏究辦並令辰沅道按年將禁革款頭名目出示曉諭俾知凜戒至佐雜苗官不准擅受苗詞之處吏部查定例佐雜人員不許准理地方詞訟遇有控訴到案卽呈送印官查辦者毋庸議如擅受而審理者

降一級調用私罪失察之印官罰俸一年公罪其因擅受而致釀人命者佐雜官革職私罪失察之印官降一級畱任公罪若印官規避處分匿不揭報卽照諱命例革職私罪又註云如揭報於已經釀命之後仍議以降一級畱任等語嗣後佐雜苗官如有擅受苗詞卽照例分別議處

一據奏稱收繳鎗械私採硝磺應責成苗官查報也此次查辦善後已據各廳縣收繳烏鎗刀械五千七百餘件解省驗收分別存毀第恐搜查仍有未盡又苗疆出產硝磺係軍火要需自應一併嚴禁嗣後如有私造私藏烏鎗器械並私採硝磺製造火藥均責成各廳縣督率苗官稽查舉報如知情隱匿與本犯一併治罪等

湖南直隸州志卷九  
語戶部查苗夷地方如有私造私藏烏鎗器械並私採硝磺製造火藥卽將失察之該管武職各官查參送部議處刑部查律載民間私藏應禁軍器者一件杖八十每一件加一等私造者加私藏罪一等各罪止杖一百流三千里又例載私造烏鎗者杖一百枷號兩箇月私藏者杖九十枷號一箇月仍各照律每一件加一等罪止杖一百流三千里又附近苗疆五百里內民人煎挖窩囤與販硝磺事發如在十斤以下杖一百其十斤以上者杖六十徒一年二十斤以上者按照五徒以次遞加五十斤以上者杖一百流二千里八十斤以上者杖一百流二千五百里一百斤者杖一百流三千里多至百斤以上者照合成火藥賣與鹽徒例發近邊充

軍若囤積未曾興販減私販罪一等又奸商販賣軍器與土司番蠻者杖一百發邊遠充軍該管官知情故縱者罪同各等語定例各有專條奉行宜資實力該督等所奏係屬申明例意應如所奏嗣後苗疆地方如有私造私藏烏鎗器械並私採硝磺製造火藥均責成各廳縣督率苗官認真查拏分別治以應得之罪如苗官有知情故縱與本犯一體懲辦倘苗官獲犯稟送而該廳縣意存消弭不卽究辦並姦民私入苗地買賣硝磺別經發覺卽將該廳縣嚴行參辦庶官民共知警惕地方日見肅清矣  
一據奏稱苗官賢否宜核實甄別以示勸懲也查苗疆額設苗備弁原祇令其催取租穀及緝捕犯徒應請嗣後於年終甄別一次

責成該廳縣畱心稽查如果勤慎奉公約束散苗安靜承催租籽全完將該把總外委列爲一等予以超擢如苗千總在任五年辦公妥協並無過誤卽拔補苗守備如苗守備在任五年辦公妥協無誤記功一次再歷三年如果始終不怠俟巡閱營伍之年歸於查看苗寨案內奏請賞加都司升銜以示鼓勵其循分供職者列爲二等如有擅離苗寨索詐苗眾或怠玩誤公催租不力按其情節輕重記過責懲降革辦理等語兵部查甄別苗官核實勸懲係爲綏靖地方起見應如該督等所請嗣後額設苗備弁均在年終甄別一次如果勤慎奉公約束安靜催租全完該把總外委准其列爲一等予以超擢苗千總在任五年辦公無誤准以苗守備拔

補苗守備在任五年辦公無誤准予記功一次再歷三年始終不怠俟巡閱營伍之年歸於查看苗寨案內奏請賞加都司升銜其循分供職者准其列爲二等仍令該督等轉飭各廳縣隨時稽察如有擅離苗寨索詐苗民或怠玩誤公催租不力卽行分別懲辦一據奏稱歸併屯倉裁汰屯長以節冗費也查鳳凰等廳縣共設屯倉一百二十六所原設總屯長五十名每名授田十五畝散屯長一百六十名每名授田七畝七分飭令經理屯倉事務從前歲收穀十萬五千餘石爲數較多自道光元年奏減租額每年收穀七萬九千餘石較原額減至二成有餘租數旣少自可將屯倉就近歸併現據辰沅道查明各廳縣屯倉相近者共二十三所可以

歸作十倉計撤去屯倉十三所裁汰總屯長四名散屯長十六名  
共二十名共撤去原授田一百八十畝仍給該屯長佃種俾免失  
業而按則完租亦可稍充經費等語<sub>臣</sub>等伏查湖南苗疆各廳縣  
徵收租穀既於道光元年奏准減額所有原設屯倉自應歸併裁  
撤今據該督等酌擬撤去屯倉十三所裁汰總散屯長二十名撤  
去原授田一百八十畝戶部查係爲撙節經費起見應如所奏辦  
理其撤去原授田一百八十畝亦應准其仍給該屯長佃種照例  
按則完租以充經費

一據奏稱苗官劄付應分別鈐印給發及由道繕給以歸簡易也  
查鳳凰等五廳縣共設苗守備千把外委四百八十六名向由廳  
縣保送辰沅道驗看詳由督撫<sub>臣</sub>及提<sub>臣</sub>會印給劄第查道標屯  
備弁拔補章程把總由道考驗詳請咨部給劄外委額外由道給  
委把總升補千總詳送撫<sub>臣</sub>考驗千總升補守備詳送督<sub>臣</sub>考驗  
歷久遵行今以苗備弁之微末自外委以至守備均須詳由督撫  
<sub>臣</sub>會印繕劄事涉煩瑣應請拔補苗備弁援照道標屯備弁之例  
苗外委把總由道給劄苗千總劄付詳由撫<sub>臣</sub>鈐印頒發苗守備  
詳由督<sub>臣</sub>鈐印頒發以歸簡易等語兵部查苗官一項據稱向須  
詳由督撫提<sub>臣</sub>會印給札未免紛煩今該督等請照屯備弁一律  
辦理用歸簡易應如所奏嗣後苗外委把總准其由道給劄苗千  
總劄付准其詳由巡撫鈐印給發苗守備劄付准其詳由總督鈐

印給發

一據奏稱每科鄉試取中邊字號田字號民苗舉人應酌減會試盤費也查鳳凰等廳縣邊字號舉人會試歷照舊章由道捐給銀四五十兩不等並勸令屯苗兵勇每名幫銀一錢或穀一斗以作路費至田字號苗舉人赴京會試照民籍舉人例給與公車銀兩之外再由道酌給盤費由是亦勸兵勇等每名幫穀一斗近年屯苗兵勇生計維艱力難照舊幫貼查屯防項下有歲支加增書院義學穀六百石應請每歲樽節穀三百石留於鄉試之年幫給民苗舉人每名穀二百石由道給領如遇

中式舉人一體照給所有屯苗兵勇幫給銀穀永行禁止其由道酌捐路費舊章亦毋庸再給等語禮部查湖南鳳凰等廳縣邊字號舉人會試由道捐給銀兩並勸令屯苗兵勇幫貼銀穀至田字號苗舉人會試照民籍舉人例給與公車銀兩再由道酌給盤費亦勸兵勇等幫給穀石近年屯兵生計維艱力難幫貼應如該督所奏將屯防歲支加增書院義學穀六百石每歲樽節穀三百石留於鄉試之年幫給民苗舉人每名穀二百石如遇

恩科

中式舉人一體照給所有屯苗兵勇幫貼銀穀並由道酌給路費均行停止庶足以示體卹而免派累

一據奏稱新舊佃欠租穀請分別豁免帶徵以紓佃力也查鳳凰等六廳縣自道光二十一年起至二十六年止佃欠未完穀一萬

二千五百五十餘石茲因苗佃貧苦請將佃欠穀石援案概予豁免並將道光二十七年佃欠未完穀二萬九百五十餘石緩至二十九年分作三年帶徵以紓佃力所有屯防當年不敷經費亦照歷辦成案在於儲備穀內撥用至請豁之租另請籌款歸補等語臣等伏查苗疆佃欠未完穀一萬二千五百五十餘石既據奏稱苗疆田土磽薄一遇歉收更形匱乏若將各年積欠同時併徵佃力實有不逮援案奏請豁免戶部查係實在情形核與請豁之案相符所有鳳凰等廳縣節年佃欠未完穀一萬二千五百五十餘石相應奏懇

天恩俯念苗佃瘠苦情形概予豁免其道光二十七年佃欠未完穀二

萬九百五十餘石亦應准其緩至道光二十九年分限三年帶徵以紓佃力至當年不敷經費在於儲備穀內撥用及請豁之租另請籌款歸補之處應俟奏咨到日再行辦理此摺係戶部主<sub>臣</sub>等悉心會議是否有當理合恭摺具奏伏乞

皇上聖鑒謹奏奉

旨依議欽此



湖南自防正考 卷九  
三

部覆給事中陳岱霖陳奏屯防四款

道光二十八年准咨

內閣鈔出道光二十八年正月二十二日給事中陳岱霖奏為苗疆屯防積弊亟應整頓以靖邊圉一摺奏稱竊查湖南省鳳凰永綏乾州三廳自嘉慶年間苗平後經前臬臣傅鼐均充民田設立屯丁練勇屯長苗官一切章程於當時籌畫頗為周備無如日久弊生雖經迭次清查究未悉臻妥善以致兵苗時常滋事現聞匪苗復有撲寨焚倉之案若不亟加整頓將來積弊日深殊於苗疆大有關係謹就臣管見所及臚舉四端敬為

皇上陳之

一苗疆官員邊俸宜核實扣算也查定例苗疆官員均以邊俸五

年期滿保升原欲其練習邊情始終勤奮方予升途乃近日題補各廳及附近苗疆州縣類多到任數月旋即謀署內地之缺其本缺輒以別項候補等官更番迭署迨五年期滿該實缺人員即可照例保升其實履任未久一切苗疆情形全不熟習雖有邊俸之名徒爲取巧之地應請嗣後苗疆地方無論何項官員均應按照到任月日扣滿實在歷俸五年方准保舉如有調署他缺概行按日扣除不准接算俸次以杜趨避而昭核實

一練勇糧缺宜令屯丁子孫挑補不得以衙署私人等濫充也查辰沅道標設立練勇一千名屯丁七千名原係當年勦苗鄉勇凱撤後設法安插分爲鄉勇屯丁名目均充民田俾資養贍其練勇

卽就屯丁中年力精壯者挑出以五百名分駐上五崗以五百名分駐下五崗與屯丁碉堡相爲犄角是屯練本屬一體所有練勇糧缺自應卽以上下五崗有功有業之屯丁子孫挑補方昭平允乃聞近日該管屯備弁貪賄營私每遇練勇缺出輒以本衙門隨帶私人或外來遊民濫行挑送考補既經入伍平時酌酒滋事無所不至一旦犯法又復輕身易遁以致釀成十六年挾借戕官重案至屯丁每名授田四畝五分卽在豐年僅贍一口迄今四十餘載生齒日繁無田可給而練勇糧缺又多爲外人佔據現在各廳記名屯丁不下數千皆無可耕之田致有生育男女溺棄不顧者情殊可憫應請嗣後遇有練勇缺出務以記名屯丁挨次挑補不

得以衙署私人及外來遊民濫行充數如有前項弊端除本人革懲外仍將該管屯備弁嚴加參處

一屯長宜酌加裁汰以杜侵虧也查屯防設立總散屯長共二百名經收屯田倉穀通計總屯長四十名每名授田十五畝每跟丁二名授田九畝散屯長一百六十名每名授田七畝五分每跟丁一名授田四畝五分在設屯之初事本繁重不能不資多人經理今則減存租穀止有七萬九千餘石零星小倉可併一倉未免人浮於事且聞近日該處屯長並非本地殷實紳耆充當多有衙門長隨及書吏子姪濫行鑽充坐食公田毫無事事其跟丁人役又佔取屯丁田額數至二三百名之多並有藩司書吏歷年在彼辦

理奏銷每人亦皆橫佔丁田不知此項田畝多一人侵佔即多一人向隅似此紛紛效尤必至屯丁之業田盡成奸人之利藪至屯長管理倉穀尤多侵蝕聞有虧短竟至數千百石者種種流弊日甚一日應請嗣後責成辰沅道將倉貯實數澈底盤查不得僅以屯長一結了事並將該處屯長名數酌加裁汰遇有缺出揀選殷實紳耆充補計省一屯長即可養數丁似亦安插屯丁之一法也一苗官宜嚴加約束以卹窮苗也查各處苗寨例不准衙門書役人等私人其設立苗守備千把等官不過令其催收苗租傳喚苗戶所有一切苗詞概不准其擅受均歸該管廳員審理乃聞近日該苗備弁妄自尊大私役苗民開墾田土遇有苗詞先行收審橫

活百官防司正考 卷九  
加需索並私設刑具任意凌虐迨至解廳審辦該苗官從中顛倒是非苗民言語不通往往曲直莫辨遂至結氣銜冤無所控訴近年以來苗民生計日蹙苗官盤剝日深欲其甘受魚肉勢豈可得至該處每年支放苗兵口糧衙門中已多折扣而苗官又從而培剋之亦使苗兵深受無窮之苦應請嗣後責成辰沅道及該管廳員隨時稽查嚴加約束如有苗官擅受苗詞私設刑具橫索苗錢及剋扣苗兵口糧等弊卽將該苗備弁嚴行懲辦以上四條均係苗疆近日實在情形應請

敕下

湖廣總督湖南巡撫悉心酌核妥議具奏如該道廳等官不能實力整頓致滋弊端應由該督撫隨時劾參以肅邊政臣爲慎重苗

防起見謹奏本月二十四日奉

上諭給事中陳岱霖奏苗防積弊亟應整頓一摺湖南乾州等廳苗匪滋事現已一律肅清善後事宜該督撫等自己斟酌妥辦惟苗疆屯防一切章程自從前定立以來難保不日久弊生亟宜整頓以靖邊圉著裕泰陸費瓌按照該給事中所奏四條悉心酌覈會同妥議具奏該給事中原摺著鈔給閱看將此各諭令知之欽此當經湖廣總督裕泰湖南巡撫陸費瓌轉飭藩臬司暨辰沅道遵將該給事中條陳苗疆屯防積弊逐款悉心妥議小變章程詳由該督撫等復加細覈於本年七月內具摺會奏八月初一日奉

硃批該部議奏欽此

臣

等查該督撫等原奏內稱查苗疆鳳凰等五廳

縣共設屯丁七千名多係捐戶子弟親族及出力之丁勇充補按名授田且耕且守原挑練勇一千名係備攻戰之用蓋練勇設在未經均田之先係在勸苗鄉勇內挑取精銳充補一經辭休故革卽應開除另行選充屯丁設在已經均屯之後係於捐戶子弟親族及曾經出力之鄉勇挑選如遇辭退病故卽以該丁子孫挑補是練勇屯丁本屬兩途歷係查照舊章分別辦理現在充勇及曾充練勇之子弟親族報名考驗入冊者已有六百餘名之多一有練勇缺出數百人共聞共見廳道層層稽核備弁無從受賄營私萬難將各衙門私人及外來遊民鑽營佔補惟屯丁生齒日繁無田可給係屬實情自應量爲變通應請嗣後練勇出有一缺准由

屯弁挑選練勇餘丁二名呈送屯守備考驗屯守備又挑選屯丁最多之鳳凰廳下五崗永綏廳屯丁記名餘丁一名一並移送廳員復挑呈道當堂考驗以十缺爲一輪共挑選練勇餘丁二十名鳳凰廳下五崗屯丁餘丁六名永綏廳屯丁餘丁四名均以技藝最優者拔補其餘各廳縣非田土全行歸公地方之屯丁記名餘丁俱不准預備挑選仍責成辰沅道隨時稽查倘有以各衙門隨帶私人及外來遊民朦混呈送考拔一經查出或被告發除將佔補之人革究外並將原送之備弁嚴行參處等語應如該督撫所奏嗣後遇有練勇缺出卽由練勇餘丁及屯丁記名餘丁內擇其技藝最優者挑選充補以十缺爲一輪不得以隨帶私人及外來

遊民朦混考拔致滋流弊並責成辰沅道隨時稽察以昭核實並  
 於每年年終將記名屯丁並現在充勇及曾充練勇之子弟親族  
 一年內挑補練勇名數分晰造具清冊送部以憑查核倘有隨帶  
 私人及外來遊民呈送考拔將朦混考送之備弁開參送部即照  
 濫給名糧拔補私人之例議處又原奏內稱吏部則例內載湖南  
 苗疆知府同知直隸州知州知縣各缺五年俸滿核實保題以升  
 銜畱任註冊俟再滿三年題請升用等語該給事中所奏自為慎  
 重考核起見以後邊俸報滿之員自應照例辦理惟查  
 大計卓異知縣以上各員例應送部引

見如奉

旨回任候升遇有應升之缺即可由外請升獨至苗疆人員如遇

大計保舉卓異例不給咨送部應俟俸滿題升時將卓異之處於摺內聲明請

旨是同一卓異人員一則保題後即可引

見回任候升一則必候扣滿八年苗俸後始准題升將會經卓異之處聲明請

旨不准先行調取引

見即使已得卓異之後未滿八年苗俸別以事故離任則苗俸不能帶於他任接算不特已積之苗俸不計即已得卓異之案亦歸無用苗疆責重而缺苦不若內地卓異人員升途之速未免向隅

臣等

公同酌議應請嗣後苗疆人員如遇三年俸滿果有才能出眾遵例於

大計案內保舉卓異者准其於接准部覆後卽行送部引

見如奉

旨回任候升卽不計苗俸與內地卓異人員一體升用以昭公允其苗疆不得卓異之員仍照定例計俸辦理等語吏部查定例湖南五年俸滿之苗疆各缺令該督撫揀選題補俸滿之員如果才守兼優政績卓著該督撫核實保題以升銜畱任註冊俟再滿三年察其治行卓越撫綏得宜遇有附近應升之缺無論應題應調應選俱准題請升用未經俸滿之先概不准以他缺更屬緊要藉詞升

調遇有應入卓薦之員該督撫仍行薦舉毋庸卽行給咨送部俟俸滿題升時仍將會經卓異之處摺內聲明請

旨等語今該督等原奏內稱湖南苗疆各缺設使已得卓異之後未滿八年苗俸別以事故離任則苗俸不能帶於他任接算不特已積之苗俸不計卽已得卓異之案亦歸無用苗疆責重而缺苦轉不若內地卓異人員升途之速未免向隅應請嗣後苗疆人員如遇三年俸滿果有才能出眾遵例於大計案內保舉卓異者准其於接准部覆後送部引

見如奉

旨回任候升卽不計苗俸與內地卓異人員一體升用其苗疆不得卓

異之員仍照定例計俸辦理等因查苗疆久任原爲要缺需人起見若一經卓薦不論年限卽准升遷恐於地方無所裨益惟內地卓異人員保題後卽可引

見回任候升苗疆人員必俟扣滿八年苗俸後始准題升是與未膺保薦者無異亦恐屈抑人才查苗疆二次八年俸滿之缺初次俸滿例限五年在任亦不爲不久應請嗣後湖南苗疆知府同知直隸州知州知縣久任各缺遇有卓薦之員查其歷俸已滿初次五年者該督撫於接到部文後卽准給咨送部引

見如奉

旨回任候升卽酌量升用毋庸再扣三年仍照例不准藉詞調補他缺

如此量爲變通庶地方旣可以得人才亦不致久屈如初次尙未俸滿雖膺卓薦仍俟扣滿五年再行給咨送部以示限制至四川廣西貴州苗疆夷疆極邊應扣八年俸滿各缺如於未經八年俸滿之先遇有卓薦人員亦照湖南之缺一律辦理所有原例應卽更正其各省八年俸滿諸缺未膺卓薦人員及三年五年六年苗疆夷疆海疆極邊各缺均仍照舊例辦理又原奏內稱查苗疆屯丁例歸廳縣專司簽補候補餘丁俱有家口清冊可憑遇有缺出廳縣不難按冊而稽查明何地段丁夫應補何地段記名餘丁不論人數多寡一律傳案當堂拈鬮補定眾目共覩他人不能鑽佔所有跟丁名目係於設屯之初因各屯長中間有辦公出力或



倡首均田而本身名下有應發之丁應授之田作為跟丁隨同本身在倉辦事然此不過百中之一二並無佔取田額至二三百名之多至每年屯防報銷均係辰沅道衙門書吏自行承辦亦無假手藩司書吏及橫佔丁田情事其屯長經營屯倉從前閒有短缺穀石由道賠補道光十八年清查案內曾經前任督撫臣奏明在案此後每值新舊交替均經核實盤查當無侵蝕虧缺情弊惟原設屯長額數較多現經於籌議善後案內酌議裁汰等語戶部查湖南苗疆屯丁例歸廳縣專司發補所有跟丁名目原係設屯之初因各屯長中間有辦公出力或倡首均田而本身名下又有應發之丁應授之田作為跟丁隨同本身在倉辦事今據聲稱此不

過百中之一二並無佔取田額至二三百名之多自係實在情形至每年屯防報銷均係辰沅道衙門書吏自行承辦並無假手藩司書吏及橫佔丁田情事亦與成案相符應如所奏辦理其屯長經營屯倉從前閒有短缺由道賠補此後每值新舊交替均經核實辦理業於道光十八年清查案內核議奏明在案應毋庸議惟原設屯長額數較多現據該督等於籌議善後案內奏請裁汰二十名業經臣另行核議應俟議覆奏明之日行文該督等遵照辦理又原奏內稱查各廳縣苗官原為約束散苗催收租穀而設至苗民詞訟苗官僅有傳送人證之責並不准擅自受理迭經臣等諄飭辰沅道隨時嚴查並復畱心體訪有則立予懲辦近來尚無

苗官擅受苗詞私設刑具橫索苗錢等弊至苗兵口糧於道光十四年有人奏參奉

旨查辦實無折扣情事行令各廳縣勒碑永禁在案第恐日久玩生潛滋弊竇臣等現於籌議苗疆善後案內奏請將各苗官按年嚴加甄別等語戶部查苗疆各廳縣額設苗官原爲約束散苗催收租穀而設其苗兵口糧自應照例核實支給今據聲稱查明實無折扣情事第恐日久玩生自應嚴定甄別章程以期經久現據該督等另於籌議善後案內條奏業經戶部會同核議應俟議覆奏明之日行令遵照辦理刑部查各廳縣苗官向不准擅受苗詞嗣後該苗官等如有擅受苗詞私設刑具橫索苗錢等事由該督等飭

屬隨時查拏從嚴懲辦所有臣等核議緣由理合恭摺具奏十月二十六日奉

旨依議欽此

Table with 10 vertical columns and 1 horizontal header row. The text is mostly blank or very faint. Faint text visible includes "二十六日奉" and "會奏請免苗疆衝廢田租並統減屯租一成籌補經費摺".

會奏請免苗疆衝廢田租並統減屯租一成籌補經費摺道光

二十九日奉

湖廣總督裕泰 湖南巡撫陸費瑤

奏為勘明苗疆均屯田土水衝沙壓及磽薄情形籲懇

天恩俯准分別豁減租額並將屯防不敷經費籌款撥補以卹苗佃而

資要需恭摺奏祈

聖鑒事竊照湖南鳳凰永綏乾州瀘溪麻陽保靖古丈坪七廳縣均屯

田土前因多有水衝沙壓其餘亦皆磽薄地利無多若仍照額徵

租苗佃力有未逮經臣等先後奏明飭令該道督同各廳縣按畝

履勘澈底清查分別給費修復豁除租額並將其餘屯租確查現

佃承種實在戶名畝數按照歷辦成案酌議輕減以示撫卹嗣因

正值農忙之時青苗遍野恐傷禾稼難以丈量又經臣等於籌議善後事宜案內奏明展至秋收後再行勘辦各在案茲據辰永沅靖道呂恩湛詳報於上年三稻登場後督同各廳縣並委員等將節年水衝沙壓田畝逐一查勘除情形較輕者均經給費修復外共計查出衝壓較久基址無存實在不能修復田六百九十三畝零共失額租穀五百八十三石零應請照例豁除並據查明其餘屯田地皆礮薄請將各屯租查照歷辦成案酌減一成並減去穀七千八百二十八石零又道光十八年清查案內奏准豁除衝廢田失額租二百八十二石零總計新舊豁除酌減租穀八千六百九十三石零由藩司萬貢珍核議詳請具奏前來臣等復查苗疆

均屯田土多係依崖傍嶺附澗臨溝其中平曠之地甚少每遇春夏山水衝注多有衝壓現經逐段查明除情形較輕者給費修復外其年久荒廢基址無存者實係難於修復此外各屯田類皆瘠薄地利無多苗佃終歲勤動收穫穀石完租之外本鮮蓋藏近年生齒日繁偶遇水旱歉收卽致不敷養贍臣等悉心體察委係實在情形所有應徵各租籽自應分別豁除酌減以示體卹相應籲懇

天恩俯准將前項水衝沙壓屯田六百九十三畝零應徵額租五百八十三石零概予照例豁除並將其餘屯田租額共減去穀七千八百二十八石零俾苗佃咸沾樂利家給戶足此後徵收租穀自必

感戴

鴻慈輸將更加踴躍惟查屯田租穀爲苗疆一歲經費要需不容稍有短絀此次清查豁除酌減共穀八千四百一十一石零又道光十八年奏請豁除衝廢田失額租二百八十二石零總計新舊豁減穀八千六百九十三石零除將上年籌議善後事宜案內奏明裁汰屯防書役義學屯長等項每年共節省穀一千三百七十七石零撥用外尚短穀七千三百一十六石零查照成案每穀一石作銀一兩計不敷銀七千三百一十六兩零亟應籌款撥補以供支用前經<sub>臣</sub>等於籌補新甯縣乾州廳兩案軍需銀兩並豁免苗疆屯佃歷年積欠租穀案內彙摺奏請在於本省暫開捐例收銀發

商生息按年撥補欽奉

諭旨苗疆屯田豁減租穀不敷經費著准其作正開銷所有該督等請暫開捐例之處著毋庸議等因欽此<sub>臣</sub>等伏查此次清查減除租穀不敷經費係屬每年必須撥補之項

國家經費有常未便按年請

帑支銷自應由外另行籌款辦理免滋糜費查嘉慶二十五年借本發商生息案內每年餘利息銀五千兩原備屯防經費之用又道光十八年因鎮筸鎮總兵公用掣肘由湖南巡撫及在省司道每年共捐幫銀一千兩以資津貼近年該鎮辦公費用毋須再行協濟已於上年停止捐幫仍將此項存備公用今苗疆豁減租額不

湖南首領正考 卷九  
敷經費銀七千三百一十六兩零應請卽將此二項共銀六千兩儘數撥給此外尙短銀一千三百一十六兩零<sub>臣</sub>等往返函商勸諭漢岸鹽商量力捐輸該商等以湖南爲漢岸引鹽溢銷受益地面情願每年捐銀一千五百兩解交湖南藩庫以助苗疆經費要需除將前項所短銀兩如數找補外尙餘贖銀一百八十餘兩仍畱司庫作爲苗疆儲備之項按年報部查核至鳳凰等各廳縣道光二十一年起至二十六年止佃欠穀一萬二千五百五十二石零於未奉文豁免之前續收穀二十六石零實未完穀一萬二千五百二十六石零<sub>臣</sub>等於善後案內奏蒙  
恩准概予豁免所有各該年不敷經費銀應遵

諭旨作正開銷容另核實造報除飭將水衝沙壓田畝及豁免酌減租額穀細數分造清冊另行咨部查核外所有清查屯田完竣豁免租額並籌款撥補不敷經費緣由謹合詞恭摺具奏伏乞

皇上聖鑒訓示謹

奏本年三月二十一日奉

上諭裕泰陸費琮奏苗疆屯田水衝沙壓懇請豁免租額並籌款撥補經費一摺湖南鳳凰等七廳縣均屯田土每遇山水激注多有衝壓既經該督等查明難以修復及礮薄各情形所有應徵租額穀五百八十三石零著加恩概予豁免其餘屯田租額並著加恩減去穀七千八百二十八石零以紓佃力至所稱屯防經費不敷籌款撥給之

處著該部議奏餘著照所擬辦理欽此旋據戶部奏稱臣等伏查湖南省每年額徵屯田租穀原備苗疆經費之需今據該督撫查明水衝沙壓各田多有年久荒廢基址無存實難修復懇請分別豁免以紓佃力現經欽奉

諭旨准將鳳凰等七廳縣應徵額租穀五百八十三石零概予豁免並將其餘澆薄屯田租額減去穀七千八百二十八石零仰見

皇上體卹苗民

恩膏疊沛之至意應令該督撫卽刊刻謄黃遍行曉諭仍將豁免租額核明田畝處所按戶給單務使實惠及民毋任吏胥舞弊倘查有將已經豁免租額田畝隱匿徵租侵吞入己情事卽從嚴參辦並

令轉飭各廳縣隨時察看如有可能修復之處卽行設法修復起徵以重賦課而裕經費至苗疆每年所需之款本不容稍有短絀今此次豁免共穀八千四百一十一石零又道光十八年奏准豁免失額穀二百八十二石零總計新舊豁免穀八千六百九十三石零自應籌款撥補茲據聲稱除將上年善後事宜案內奏准裁汰屯防書役等項每年節省穀一千三百七十七石零撥用外尙短穀七千三百一十六石零查照成案每穀一石作銀一兩計不敷銀七千三百一十六兩零請將嘉慶二十五年發商生息案內每年餘剩息銀五千兩並將湖南巡撫司道每年幫貼鎮守公用現經停止仍捐存備用銀一千兩儘數撥補苗疆經費臣等查嘉

慶二十五年發商生息案內每年餘贖息銀五千兩原係作為苗疆貯備專款至該省各官每年幫貼鎮筸鎮辦公銀一千兩該鎮公用既經充足無須協濟應准其將此二項共銀六千兩儘數撥補尚不敷銀一千三百一十六兩現據該督撫勸諭漢岸鹽商情願每年捐銀一千五百兩解交湖南藩庫以助苗疆經費除將前項所短銀兩補足外尚餘銀一百餘兩仍畱司庫作為苗疆貯備之項按年報部查核應如所奏辦理至鳳凰等廳縣道光二十一年起至二十六年止佃欠未完穀一萬二千五百二十六石零業於善後案內奏准豁免其各該年不敷經費應遵旨作正開銷之處俟另案造報到日再行查辦所有等核議緣由理

合恭摺具奏奉

旨依議欽此





田及歷次減租底冊逐細核對查嘉慶十九年奉 前督憲馬  
撫憲廣 清查 奏案內稱嘉慶十年及十二年十三年三年  
奏報丈收田土除給屯長屯丁老幼丁等領耕實餘田土九萬三  
千二百十五畝召佃收租歲徵額租七萬九百二十一石二斗以  
供鹽菜經費復於正租之外徵收餘租二萬八千餘石作為外銷  
籌款按年支用又十四年傅爾詳報丈收田土一萬五千二百十  
九畝三分十六年以後續查出田土五千八百七十三畝二分均  
未入 奏報部前項田土除撥給營兵等領耕及撥補水衝沙壓  
並礮卡圈佔田土一萬一千八十四畝三分實餘田土一萬八畝  
二分每年徵租五千六百六十三石二斗亦歸入餘租內撥作加

增書院義學等項之用 每歲計徵正餘租十萬五千四百餘石按  
則減去租穀五千五百石每年定以額租九萬九千九百八十八  
石三斗九升等因又道光元年奉 前督憲陳 撫憲左 清查  
奏案內稱屯防佃租自嘉慶十九年清查案內 奏定額租九  
萬九千九百八十八石三斗九升歷年照額徵收以供經費今為  
苗疆經久之計減去租穀二萬零七百七十石等因自道光二年  
秋收起每年額徵佃租七萬九千二百一十八石三斗九升至今  
沿為定額恩湛以案核冊如嘉慶十二年均屯未盡事宜案內  
奏報丈收永綏廳開墾田土一萬零一百三十畝前道係照依苗  
俗以牛力一工為一畝先行詳請入 奏及至丈量計多出田土

二萬零二百六十畝經前道詳明仍照原額納租又嘉慶十四年詳報丈收各案田土一萬四千零四十五畝六分六釐冊開丈收田土一萬五千二百一十九畝三分較之詳案計多出田土一千一百七十三畝六分三釐其閒抵補提撥往復糾纏逐加考核實尙不敷詳案內一萬四千餘畝之數而嘉慶十九年清查仍以冊載一萬五千二百一十九畝三分聲敘入 奏溯查案冊不符之故皆因當日丈量甫訖卽行詳報厥後多有重丈退出及漏未丈收之事以致彼盈此絀有以土五畝作田一畝抵補者又有分給田土時是案覆丈短缺復於另案提撥充數者名目分歧頭緒繁雜又均田底冊開載田土等則各廳縣名目多寡不同科租亦未

畫一鳳凰乾州瀘溪麻陽四廳縣田畝只分水旱二項古丈坪保靖二廳縣分有上中下則惟永綏廳田土俱分有上中下則及瘠薄最爲瘠薄五項名目又道光元年清查減租底冊各廳縣辦法亦各互有參差今以鳳凰一廳而論該廳田畝原止分水旱二項而冊內係按上中下則及瘠薄四項分別輕重核減如一戶佃田若干坵積若干畝額納租穀若干石於每戶田租數目結總後登明按上則減租若干按中下則瘠薄各減租若干其上中下則及瘠薄四項係屬是何坵段各有若干畝分無憑稽核近年以來輾轉接佃及一戶分爲數佃者最多若以均田底冊爲憑則冊內並無等則若以道光元年減租底冊爲憑則原減之上中下則及瘠

薄四項名目毫無依據此次減租須確查實在佃名如遇一戶之田數佃分種各佃坵段不同無從區別上中下則及瘠薄四項名目核計畝分委係礙難循辦若以屯苗備弁現在勘報爲憑或恐高下其手難期悉昭公允至均屯減租各冊內乾州瀘溪麻陽三廳縣與鳳凰廳情形相似其承綏古丈坪保靖三廳縣田土雖有原分等則迨經恩湛督同各丞令按冊確查亦未能一律核實毫無疑議竊思道光元年減租名目各廳縣多寡不同此次未便踵行若以上中下三則執爲一定不移之法則減租必有等差誠如憲諭設使毘連田畝兩佃分種肥瘠不甚懸殊而租數輕重不一將來轉恐別滋事端現經恩湛反覆思維再三籌議惟有於道

光元年減定屯租七萬九千二百一十八石三斗九升六合六勺原額內除十八年清查案內 奏准豁除水衝不能修復田共失額租二百八十二石七斗七升零六勺又此次勘報水衝沙壓不能修復田土共失額租六百四十九石一斗八升一合三勺四鈔外實存應徵額租七萬八千二百八十六石四斗四升六合六勺六鈔擬請酌減一成共減去租七千八百二十八石六斗四升四合四勺六鈔六撮每年實應徵租七萬零四百五十七石八斗零一勺九鈔四撮庶幾民苗各佃實惠均沾以免私議而杜後患是香有當除另詳呈請外理合呈明 憲台俯賜核察爲此具詳伏乞照驗施行

湖南高陽屯政考卷九 三

詳酌議豁減屯租及擬籌補各款

道光二十八年

辰沅 呂恩湛

為查議具詳事竊照苗疆均屯田土深處萬山之中多係依崖傍  
嶺附澗臨溝近年以來苗民生計支絀雖高山顛頂崎嶇極險之  
區無不攀援而上墾種雜糧土因鋤動鬆浮每遇春夏山水漲發  
泥沙水石夾雜奔流當衝之處實有被水衝壞及沙石積壓不能  
修復田土道光二十七年十一月十一日內蒙 憲臺先後附片  
奏請清查並示諭各屯佃自行開報四至官為勘辦各在案除  
此項水衝沙壓勘明實在不能修復准其詳請 奏懇豁除外其  
餘屯租又奉 憲臺於覆 奏勦捕夥款抗租痞苗事竣案內附

片 奏奉

諭旨行飭欽遵查照歷辦成案酌加輕減亦在案恩湛先後奉札當卽飭屬遵辦嗣因屯防田土坐落苗疆鳳凰乾州永綏古丈坪保靖瀘溪麻陽七廳縣地方廣袤七百餘里甫據屯苗備弁督佃開報完竣時已青苗遍野不便查丈又經恩湛詳請展至秋收後覆勘詳辦旋值三稻登場恩湛遵復督率印委各員確查覆勘去後茲據各廳縣並委員卽補府經歷黃兆源鳳凰廳知事毛寶燧麻陽縣巖門縣丞周悅試用按察司照磨梁放道庫大使易學治署鳳凰廳經歷歐陽實試用縣丞吳逢達等先後查勘造冊稟齎到道總計此次查出節年水衝沙壓實在不能修復田六百九十三畝

四分四釐零八絲八忽每年缺租六百四十九石一斗八升一合三勺四鈔實係水衝沙壓基址無存應請 奏懇照例豁免其尙可修復者現經恩湛酌量情形分別籌給修費勒限修復務期一律培壅如舊仍行照額納租復查道光元年清查案內 奏稱查屯防佃租自嘉慶十九年清查減租案內 奏定額徵九萬九千九百八十八石三斗九升歷年照額徵收以供經費今爲苗疆經久之計共減去租穀二萬七百七十石等因自道光二年秋收起每年額徵佃租七萬九千二百一十八石三斗九升六合六勺內除十八年清查案內 奏准豁免衝廢田失額租二百八十二石七斗七升零六勺又現在勘報衝廢田土詳請 奏懇豁免失額

海南直隸州志卷九  
租籽六百四十九石一斗八升一合三勺四鈔實存應徵田土租  
籽七萬八千二百八十六石四斗四升四合六勺六鈔惟苗民生  
計全無而屯田內皆瘠薄地利無多數十年以來生齒日繁各苗  
佃終歲勤動收穫穀石完納之外實鮮蓋藏偶遇水旱歉收卽難  
免不敷養贍上年痞苗糾眾合款煽惑良苗無非藉此爲詞現辦  
清查除將水衝沙壓田土分別勘辦外此項屯租擬請 憲臺查  
照歷辦成案 奏請酌加輕減共減去租穀七千八百二十八石  
六斗四升四合四勺六鈔六撮以示體卹庶各佃於正供之外多  
得盈餘俾苗民身家足贍稍獲蓋藏從此不虞有備邊圉永慶救  
安其應納租穀自必更加踴躍輸將矣核計新舊衝廢失額併各

屯租酌減共去租籽八千七百六十石五斗九升六合四勺零六  
撮尙存應徵租籽七萬零四百五十七石八斗零一勺九鈔四撮  
又本年七月內奉 憲臺於籌議苗疆善後事宜案內 奏稱俟  
後佃戶完納租籽尾數在六合以上者進收一升如在五合九勺  
以下者退出不計等語本年業已遵示奉行在案此項進收退出  
共不敷原額租籽三百五十二石三斗一升零一勺九鈔四撮查  
苗疆屯田民佃不及十分之一餘俱苗佃歲輸租籽爲屯防一歲  
經費之需除現議豁除酌減及進退尾數合勺不敷外實歲收應  
徵租籽七萬零一百零五石四斗九升每年屯防經費共計不敷  
穀九千一百一十二石九斗零六合六勺查本年善後事宜案內

已奉 奏明裁汰均屯總局書役工食穀七百八十七石六斗又裁汰義學節省穀四百七十二石又裁汰屯長二十名撤出原授田一百八十畝內除勘明水衝沙壓失額及原授短缺共一十一畝五分外實收回田一百八十六畝五分即將奉裁屯長改爲佃戶照田按則科算每年應徵租穀一百一十七石九斗五升共除穀一千三百七十七石五斗五升以之抵用外每年實不敷穀七千七百三十五石三斗五升六合六勺按照歷辦成案每穀一石實需銀一兩應請籌補銀七千七百三十五兩三錢五分六釐六毫查有嘉慶二十五年借款發商生息歸足原本每年餘贖歸本息銀五千兩應請 奏懇援照原案撥充屯防經費其餘不敷銀

二千七百三十五兩三錢五分六釐六毫道庫無款可籌應請飭司籌議按年撥補又本年善後案內 奏准豁免鳳凰等廳縣道光二十一年起至二十六年止佃欠穀一萬二千五百五十二石四斗六升八合九勺五鈔除於未奉文之前續收穀二十六石一斗一升六合二勺外實未完穀一萬二千五百二十六石三斗五升二合七勺五鈔節年徵租短缺當年經費不敷均係於逐年徵收新租內通融挹注以供支發應請飭司籌款發給買補還倉所有酌議豁減屯租及擬請籌補各款緣由理合詳明 憲臺俯賜查核批示祇遵再本年善後事宜案內奉 憲臺 奏准於屯防項下歲支加增書院義學穀六百石內每歲樽節三百石留於鄉



試之年幫給民苗舉人每名穀二百石由道給領如遇

恩科

中式舉人一體照給等因此項每歲樽節穀三百石除三年一次支給民苗舉人幫穀四百石外餘贖穀石擬請俟屆滿十年詳請變糶一次價銀解貯司庫聽候撥充公用不入正案按年報銷以清款項合併聲明

一十六年六月... 一萬二千五百二十六百... 一萬二千五百二十六百... 一萬二千五百二十六百... 一萬二千五百二十六百... 一萬二千五百二十六百... 一萬二千五百二十六百... 一萬二千五百二十六百... 一萬二千五百二十六百... 一萬二千五百二十六百...

附錄

稟到任後查辦地方情形

光緒五年 辰沅道 但湘良

敬稟者竊職道猥以輕材謬權邊徼記鯉庭之趨侍昔年則風土

常親縮躬綬以分巡此日則冰淵倍懍事權綦重經畫宜先矧茲

犴草搖花久涵濡乎

聖澤

觀此金戈玉壘倍景仰乎前賢竊謂武備宜修而文教尤宜興也

苗民宜恤而官方尤宜飭也舊章具在成法堪師因地制宜運籌

務當除將十月十五日到任視事日期備文申報外伏查辰沅道

與鎮筵總鎮同城所屬三府一州四直隸廳共一十四縣近接川

黔界連粵鄂地僻山深民苗雜處自嘉慶初年戡定後設屯養勇

建置礮哨星羅碁布與營汛塘堡聲息相通洵足鞏巖疆而壯聲

勢迫疊次卹佃減租加以漢皋生息銀兩燼於粵氛一炬經費支  
 絀今昔情形不無少易職道到任後勾稽屯籍巡視邊防於武備  
 文教民生吏治各大端謹籌數事敬為 憲臺陳之一勇丁宜勤  
 練也鳳乾永古保五廳縣原建礮卡一千一百七十二座卽以均  
 田子孫充補屯丁計七千名劃段分守遇警卽逐礮傳梆由堡而  
 城瞬息可達農隙仍練習弓馬此屯兵也苗兵五千名設苗備弁  
 四百八十六名遞相鈐束戡定後兵器概令追繳不容以武力相  
 角習惟隨備弁催收屯佃各租此苗兵也駐城戰勇一千名做營  
 制考馬步戰守糧分左右隊設屯守備六員屯弁五十名除撥駐  
 卡管束屯丁催收屯租外以守備二員並挑派千總外額等弁專

駐校場管帶此練勇也分屯合守部署極為周密惟歷久不無暇  
 逸玩愒之虞現雖黔地肅清邊氛寂靜兵可百年不用究不可一  
 日不備職道意訓練必自駐城戰勇始卽照傅前升道館所定章  
 程每月按期操演校閱必親俾其紀律深明技藝嫻熟仍分別優  
 劣予以獎勸秋收後卽飭各屯兵陸續更替來城逐加訓練務使  
 兵屯一氣守望相資庶不失前人創置之美更可為邊隅扞衛之  
 資矣一文風宜激勵也查所屬文風辰郡為最餘府州次之三廳  
 又次之初設屯防案內於鳳乾永保麻瀘六廳縣各設書院一所  
 復 奏請科場分別編邊田字號以宏作育而示鼓勵惟時屯款  
 充足膳脩極豐均遠聘名師主講士林羣資樂育卽苗民亦知向

湖南直隸中正考 卷九  
學往歲黔苗滋事而楚苗不爲之煽惑者固鈐束有方未始非文教有以默化之也繼因疊奉減租膏火改發穀石咸豐初復髮逆竄漢屯防應領生息籌備俱無從出酌裁經費案內 奏明書院束脩亦一例發穀俸脩愈薄遠聘爲難第以本地舉貢學問較優者聘爲山長該生童等亦以膏火難敷甄別後或設館教讀或別謀生計多不住院肄業月課僅由齋夫散題收卷送閱漸形懈怠職道 現擬出示曉諭凡考取書院甄別有名者悉住齋誦讀按期課試遇有接連三次曠課者卽由監院稟請扣除膏火加給奮勉生童並每課酌增獎賞以示鼓勵如有文行兼優堪資造就者由職道 捐銀優獎俾資觀摩又原設屯苗義學一百二十館亦因館

穀不敷塾師多未到館徒考取支穀而已現亦檄飭各廳縣認真稽查如有曠館亦卽扣除另訂務使無力延師之家其子弟皆得從學咸知尊師向化肅紀敦倫去其悍健之性共成禮讓之行庶士習民風蒸蒸日上矣一地制宜力作也鎮筵城外溪河一道由瀘溪直達辰郡中阻老河口巨石橫亘船難渡越屯防應徵麻瀘租穀須由麻陽河設倉石羊哨收納距城二十餘里各縣運解鎮標兵米亦皆儲此兵丁支食維艱偶有不靖尤需先撥兵勇赴彼防護卽商民運貨進城亦多費腳力歷任亟思開鑿以便轉運未底於成前陳陸兩道集資疏濬儘可容舟而商民仍未暢行者蓋本地一無土產來或滿載歸祇空舟是以裹足不前查筵境均田

而外儘有土山人惟知栽種包粟雜糧桐茶油樹等類煤炭鉛  
鑛間亦經前人試採草地與乾州緊接現乾州已有試種茶葉獲  
利者陸前道曾捐資購種分給奈鄉人貧極欲速憾不朝種夕收  
且栽種不盡合法仍無大益現經職道會同唐鎮捐廉前往各處  
購買茶種就附近乾州一帶分給各營屯紳耆承領並多僱工人  
教以栽種之法戒毋過事求速待生機勃發蔓植自廣人情見利  
必趨三五年後果有成效則不督之種亦必自種更教以養蠶樹  
桑再得煤鉛暢旺商人趨利若鶩則城河不期開而自開矣既富  
求庶而教亦易施是亦撫綏地方之一道也一官方宜整飭也辰  
郡以上爲古梁州之域水險山惡人情强悍好勇鬪狠習爲常事

近多由營造回者漬染惡習尤甚三五成羣每生事端且人多尙  
利織芥必爭甚至同室操戈縉紳之族亦難免違理犯法之事爭  
鬪互肇獄訟繁興是在地方官畱心體察就地設施現今編查保  
甲整飭團防是其要務而嚴查蠹役訟師清理詞訟亦應就事整  
理俾除暴卽以安良而治人尤先治己職道履任未久各屬多未  
接見於辦事之得失驗才具之優劣隨時考查以徵實效至於佐  
貳雜職自以安分爲上苗疆尤宜安靜無擾嚴札諭飭毋許擅受  
民詞藉端生事其有濫差濫押庸劣之員自當從嚴劾辦苗官並  
諭令小心奉公毋得剝削苗民滋生事端職道亦惟正己率屬勉  
求治理以仰副 大人澄敘官方保乂斯民之至意再此外如有

應興之利應除之弊仍當隨時稟請訓示遵行是否有當合將抵任後查辦地方情形具稟大人俯賜察核示遵

（此處為多欄空白或極淡之文字，內容不可辨）

附錄 稟整頓屯務 光緒五年

辰沅 但湘良

敬稟者竊照湖南苗疆戡定以來經前任傅升道整頓邊防籌修  
礮卡額設屯苗兵丁以資耕守經畫均屯田土以充經費數十年  
來苗民感戴德威洗心革面獷悍之俗漸變馴良惟是屯務紛紜  
經費繁重事經日久流弊滋多徵收之督責固貴從嚴積弊之相  
沿尤宜痛革查遞年額徵租籽各前道造報數目每年均有佃欠  
數百石不等而帶徵積欠更屬完繳寥寥以致經費時形支絀亟  
應明定章程認真催收以裕供支擬請嗣後遞年額租舊欠嚴飭  
屯苗守備督率各弁實力催徵如額租全完又能帶完舊欠者洵  
屬催收出力應卽記大功一次積至兩屆記大功者卽予保獎僅

湖廣直隸司正考 卷九  
祇額租全完者記功一次積功二次作大功一次計算其欠額租數在五石以上者酌予記大過一次一百石以上者記大過二次積大過二次即予撤任欠數不及五十石者記過一次積過二次作大過一次計算仍准其功過相抵如此分別勸懲庶各弁認真催徵不致如前怠玩抑職道更有陳者屯弁催收租穀屯長管理收支各有專責不容弊混訪聞屯備弁等竟有藉催租為名勒索屯長供應並將未收之穀逼令屯長具報收竣者又有屯長浮收斛面並挪新掩舊營私肥己者有佃戶將租穀灌水攪沙逼令屯長收倉者有各倉徵收租籽並無租穀入倉輒以苗兵口糧輾轉私相折抵以致佃戶觀望不前者種種弊端不勝枚舉如本人

係屬苗兵又兼承佃公田似尚可以通融折抵其兵而非佃及佃而非兵即不能任其私相折抵致滋轉轉牽混職道現經嚴飭各屯苗備弁屯長等務各遵照定章認真催收支放從前流弊概行痛革仍隨時密加查訪如有前項情弊立即分別詳革究辦庶屯務漸有起色而邊防不無裨益矣職道忝任監司責無旁貸惟有竭力整頓勉供職守不敢因暫時攝篆稍涉因循以期仰副 大人綏靖邊疆之至意是否有當合將查辦屯務緣由具稟 憲臺察核批示祇遵

湖南官防中政考卷九 三

附錄 通飭所屬將民生利弊查照本道舉辦事宜六條奉行

光緒五年

辰沅 但湘良

為札飭遵照事照得州縣直隸廳均為親民之官一切民生利弊亟應認真講求設法整頓以除積習而挽頽風本道下車以來已逾市月簿書鞅掌敢憚勤勞淡泊明心無忘素志所願與各寮屬共矢清勤力圖治理以期和衷共濟保乂民生茲特略舉應辦事宜六條通飭各屬一體遵辦除分札飭遵外合就札飭札到該州縣即將粘單開列各款遵照實力奉行在官盡一分之心小民即受一分之益慎毋視為具文敷衍了事致負本道諄諄誥誡之意仍將奉札遵辦緣由先行稟覆毋違特札

一操守宜嚴也人必廉靜寡欲心無私累則遇事持平無偏無黨公能生明利令智昏天理人欲之界判如也吾儕委贄策名上爲國家撫治黎民下爲地方培養元氣宜如何兢惕自持無曠厥官庶不負幼學壯行之志若稍涉偏私賄賂公行小民有不堪命者矣爲民父母而令子民顛連困苦賣田鬻產以給上供吾人具有天良當不若是之忍第恐操持稍懈有爲物欲所撓者矣語曰廉吏不可爲而可爲貪吏可爲而不可爲天地鬼神臨之在上質之在旁所願與諸同志共勉之其各精白乃心靖共爾位是所厚望焉一僕從宜減也州縣官一經到任親朋故舊薦家丁者紛至沓來因愛物而及烏遂兼收而並蓄其從如雨百十成羣不知若輩祇

爲圖利而來迨至人浮於事無可位置有橫生觖望者矣有作奸犯科者矣是宜大加裁汰擇其端謹誠樸者酌派差事其輕佻浮滑之輩一概擯斥且人少則約束易周防範易密既可節省亦免生事是亦儉以養廉之一道也

一聽訟宜勤也小民不平則鳴原難使其無訟惟人情刁詐百弊叢生且有積慣訟棍從中把持顛倒是非以疾病老死爲人命以錢債口角爲搶奪挾仇成訟擇肥而噬海市蜃樓變幻莫測地方官僅憑一面之詞飭差拘訊即使涇渭立分而被誣已受累無窮矣而訟棍猶以案結無可營私又或鼓其簧舌教令刁翻甚至被告拘繫累月經年原告匿不到案以致審結無期實爲地方之害



嗣後各廳州縣每逢告期務須親自收呈虛衷研鞫理屈詞窮者斥責不准卽有理非大不得已者亦必委婉勸解告以利害勿任爭訟如原告遞呈而被告適亦來訴者卽將兩造之詞提出令兩造之人立於堂下俟收詞事畢傳至質訊登時可結省卻無限葛藤其真有冤屈者卽出票傳人按程計日不准延擱逾限者立傳原差嚴比斥革不稍寬貸至於人證株累此弊尤宜痛革每呈到手細閱不干緊要人證立予刪除其必須傳質者訊明立予省釋不可畱難又牽涉婦女之案不可輕傳縱須傳質審明立卽交其親屬領釋照例不准濫押以至廉恥總之聽訟一事隨到隨審隨審隨結審後洞開大門目送兩造俱不准衙役索賄私押庶幾案

無畱贖民鮮拖累

一獄囚宜恤也小民無知誤罹法網到官審訊按情定罪或已經招解題達發回監禁或監候待質深幽囹圄在該犯等身犯刑章固屬孽由自作而爲民上者宜存哀矜之心如傷之念隨時督率典史赴監看視勤加打掃毋任污穢薰蒸口糧務須給足不准剋扣冬給棉衣病給醫藥夏給單席蒲扇禁卒人等有拷打勒索凌虐情弊立予嚴懲不稍寬貸其餘戶婚田土錢債細事並各案牽連人犯概予保候無任濫禁在獄並不准差役私設班館濫押人犯魚肉鄉民如違嚴辦

一命案宜慎也人命重件固以供證爲憑尤以屍傷爲據一經據

報立即輕騎滅從帶領刑件無論城鄉即刻相驗蓋速則屍未發  
變金刃手足他物各傷一一可以比對且必親手揣摩勿避污穢  
庶屍親心服不致翻控遲則屍傷難辨傷痕不明案情即不確從  
此疑竇百出辦理棘手矣至於相驗之時一切夫馬火食概由本  
官自備不准書役索詐分文驗畢回至中途或猝呼某書役名未  
來者必是在後需索務加重懲總之下鄉則令書役隨後而本官  
居前回署則令書役向前而本官在後若輩雖有伎倆無所用之  
至盜案是強是竊全以勘驗為憑一經報到亦即無分兩夜會營  
飛速詣勘明確勒限嚴緝如有遲延處分綦重均不可不慎也  
一捕役宜懲也大凡捕役類皆與盜為伍且有參盜分肥者以此

捕盜是以盜濟盜耳故欲弭盜必先治捕每報一案隨即出票偵  
緝立限嚴比務期賊賊俱獲不准栽贓誣民設有賊無賊必須逐  
細研訊如果所供之賊與報案相符方是正賊賊犯所供窩家一  
併嚴拘懲辦其誤買賊贓者由於不知之故其情大有可原只許  
取贓給主不准拏人仍於犯人名下追賠給領以符定例而免擾  
累

敬稟者竊照鎮筸地方僻處深山界連黔蜀為屯苗兵民雜處之  
 區亦散勇外匪藏匿之藪加以上年冬間貴州思州府屬之馬鞍  
 山匪徒搶掠滋事防黔各軍又經酌量裁汰更難保無匪徒散勇  
 潛蹤溷蹟巡防稍有未周即恐乘間騷越亟應清查保甲實力巡  
 防使匪徒無從託足地方得以又安前奉 憲臺通飭認真編查  
 保甲仰見 大人整頓地方保衛民生之至意曷勝欽佩伏查保  
 甲之法正本清源實為弭盜良策昔朱文公行之安邑王文成行  
 之贛州皆有明效所患有司奉行不力視為具文舉辦不得其人  
 空存成法故曰徒善不足以為政徒法不能以自行 職道業經嚴

附錄

查辦保甲酌擬委員功過章程

辰沅道 但湘良

敬稟者竊照鎮筸地方僻處深山界連黔蜀為屯苗兵民雜處之  
 區亦散勇外匪藏匿之藪加以上年冬間貴州思州府屬之馬鞍  
 山匪徒搶掠滋事防黔各軍又經酌量裁汰更難保無匪徒散勇  
 潛蹤溷蹟巡防稍有未周即恐乘間騷越亟應清查保甲實力巡  
 防使匪徒無從託足地方得以又安前奉 憲臺通飭認真編查  
 保甲仰見 大人整頓地方保衛民生之至意曷勝欽佩伏查保  
 甲之法正本清源實為弭盜良策昔朱文公行之安邑王文成行  
 之贛州皆有明效所患有司奉行不力視為具文舉辦不得其人  
 空存成法故曰徒善不足以為政徒法不能以自行 職道業經嚴

飭各屬一體認真遵辦不准徒託空言惟查鳳凰一廳民地向編上下五崗兼轄鎮筵中左右前四營苗地爲全邊咽喉地方最關緊要其苗寨保甲事宜業經督同該廳嚴飭苗守備等認真稽查不准苗人出外生事亦不准容畱外來游民潛匿苗寨如敢故違許由苗官查實指稟拏究並將容畱之苗戶一併網送究治不得徇隱縱逃致干查出併究至民地則客寓煙館及庵廟寺觀空院祠宇最易藏奸當經會商鎮筵總鎮督飭鳳凰廳江丞肇成選舉紳耆慎擇牌長甲長責成畱心稽查原給門牌如有增減不符隨時稟請更換一面申明連坐之法遇有在鄉爲匪之人里鄰不行首報一併懲治仍由該廳不時親往抽查辦理尙屬認真

職道並

選派道標千總王廷顯符永春把總熊昌齡外委邢有光額外趙玉寶滕兆年及總查試用通判劉光輝散查試用從九費邦達董元休督帶差役練勇赴城鄉內外各街道會同鎮標弁兵分段無分雨夜實力巡查自上年十月起至本年正月止三月有餘地方極爲安靜並無搶劫失竊之案鳳凰廳江丞到任以來於地方一切公事均能認真整頓而查街各員弁奮勉巡緝不辭煩瘁亦屬著有微勞惟查街員弁並未定有功過章程似不足以昭懲勸茲

職道

悉心酌議除鎮標弁兵已咨請鎮筵總鎮酌核辦理外所有

道屬凡查街員弁如果三月內所巡地方安靜並無失事記功一次積功三次者文員給予超委一次武員給予拔委一次如三月

內失事一起記過一次積過三次即撤去差使另委接辦仍准其功過相抵如此酌加懲勸庶各員弁咸知奮勉於地方不無裨益所有此次查街出力員弁可否即照現擬章程各給予記功一次以示鼓勵之處出自 憲恩是否有當理合具稟 大人察核批示祇遵

湖南官防屯政考  
卷九  
五

附錄 示諭栽種茶葉以興民利 光緒六年 辰沅 但湘良

為剴切勸諭以興民利事照得鳳凰廳屬地方山多田少小民衣食艱難山中雜糧土產除包穀桐茶油以外所出甚少曠土尚多農功未盡何怪窮民衣食無資朝不謀夕甚至流為乞丐盜賊害已害人深堪憫恤現在乾州已有栽種茶葉獲利者鳳地與乾州近接何不可倣照栽種茶葉一項利息無窮前道曾經購種分給各鄉紳耆勸諭種植奈鄉民等不知佈種造作之法抑因家多貧寒速於求利恨不朝種夕收不如蕎麥包粟歲可獲利以致實力奉行者甚屬寥寥是有利不興土多曠廢洵為可惜本道目睹情形不忍使斯民坐守窮困廢此養生之舉除專丁分赴各處收買

茶種設局散發並雇熟悉佈種造作之人來局教明種作之法外  
合行出示勸諭爲此諭仰城鄉紳庶人等知悉卽赴局承領茶種  
遍散人民務令已知者益加努力自致豐盈向來未知者共聽吾  
言勤耕力作將來人人有衣食之資自無不勉爲良善實於地方  
大有裨益焉毋違特示

附錄 種茶造茶法 光緒六年

長沅 但湘良

種茶須於寒露時摘取茶子以熟土鋤鬆潑糞勻散土中不宜過  
密亦勿掩土過厚茶子能隨摘隨種更好若久畱則不能顆顆盡  
發如往稍遠地方買來必須將茶子日夜鋪在地上使沾土氣卽  
日期稍多亦可不碍下種後卽於茶旁隙地及四圍徧種黃豆俟  
春季發生時豆苗之滋長可以蔭護茶芽不致爲烈日所損將來  
黃豆成熟已屆秋深太陽不甚酷烈茶芽亦漸長老不畏風日無  
須豆苗遮護自可滋生培植三年可以採取且黃豆亦得收成誠  
爲一舉兩便造茶有清茶紅茶兩種清茶葉宜稍嫩於穀雨前後  
採之紅茶可稍粗於立夏前後採之造清茶以新採茶葉置鍋內

微火略炒至軟取出置盤箕內以兩手搓按圓轉令茶葉不散爲度然後置竹器中鋪勻以微火焙乾造紅茶則不用火炒而以新採茶葉置太陽下曬軟以腳蹂蹂亦令葉不散爲度再置太陽中曬半乾收入羅筐內用手拍緊約三時之久色味方勻仍鋪太陽下曬乾清茶隨處皆用紅茶惟洋人買運最多茶商各處收買運至上海值銀以千百萬計以中等價言之清茶每觔可賣錢二百文紅茶每觔可賣錢三百文甚至五六百文不等諺云栽茶百株入口無憂湖南之安化平江等處卽爲明驗若本地無茶子可種本道捐資購買茶種設局散發儘可赴局請領試種或本地紳富有出資往產茶地方採買茶種借給鄰近之家亦可或願以荒山

佃與貧人開墾佈種議定生茶幾年後酌稍納租更爲人已兩利之道人人衣食有資地方自然安靜然後禮義可興風俗醇厚是不能無望於縉紳之士矣

不謂無聖效謂時之士矣

之度人人亦自宜皆賦式自然矣爾然則雖義何興風谷謂其  
而與資人開鑿而蘇蘇家主茶效半對階蘇蘇更添人

卷九終



